

SAKSPAPIR

Saksnr	Utval	Type	Dato
012/18	Formannskapet	PS	25.01.2018
	Kommunestyret	PS	

Saksbehandlar	ArkivsakID
Hogne Haugsdal	14/7410

Vidare arbeid med Nordhordland biosfæreområde

Rådmannen sitt framlegg til vedtak:

- Lindås kommune støttar Region Nordhordland sitt kandidatur til å bli eit UNESCO Biosfæreområde.
- Kommunen forpliktar seg, i samarbeid med dei andre kommunane i regionen, å finansiere sin rettmessige del for første fasen av biosfæreområdet si verksemd - innanfor den ramma som er sett i prosjektbudsjettet for perioden 2019 – 2021.
- Finansiering blir avklart i samband med økonomiplanprosessen for 2019.

Formannskapet - 012/18

FO - behandling:

Rådmannen sitt framlegg vart vedteke med 8 røyster, mot 2 røyster (N.Øvreås-Frp og B.Vatnøy-Frp).

FO - vedtak:

- Lindås kommune støttar Region Nordhordland sitt kandidatur til å bli eit UNESCO Biosfæreområde.
- Kommunen forpliktar seg, i samarbeid med dei andre kommunane i regionen, å finansiere sin rettmessige del for første fasen av biosfæreområdet si verksemd - innanfor den ramma som er sett i prosjektbudsjettet for perioden 2019 – 2021.
- Finansiering blir avklart i samband med økonomiplanprosessen for 2019.

Saksopplysningar:

Saka skal til innstilling i formannskapet
Saka skal avgjerast i kommunestyret

Kort om saka

Juni 2013 inngjekk Regionrådet i Nordhordland og Universitetet i Bergen ein samarbeidsavtale om å arbeide for at Region Nordhordland skal bli eit UNESCO Biosfæreområde. Arbeidet starta med ein forprosjektstudie som viste korleis Nordhordland kunne fylle krava som UNESCO set til slike område. Våren 2015 vart alle kommunane samde om å fremme Nordhordland sitt kandidatur til å bli det første UNESCO Biosfæreområdet i Norge. Søknaden vart innvilga av den norske komiteen for programmet «Menneske og Biosfære» (MAB) og tilbakemeldingane frå MAB og UNESCO sin administrasjon i Paris, er at Nordhordland fyller alle kriteria som er sett til ein slik status. Regionen er ein nytenkande og spennande kandidat, med sær mange gode kvalitetar til å vere eit biosfæreområde. Region Nordhordland sitt kandidatur har vakt stor interesse og begeistring også internasjonalt innan MAB-programmet.


Nordhordland Utviklingsselskap IKS har samarbeidd med Universitetet i Bergen (UiB) om biosfæresatsinga. Det vart etablert eit prosjekt og oppnemnt styringsgruppe og arbeidsgruppe. Styringsgruppa har hatt som oppgåve å sikre målstyring, innhald og framdrift i prosjektet, medan arbeidsgruppa har arbeidd med hovudsøknaden, informasjonsarbeid og gjennomført aktivitetar i perioden. Forprosjektarbeidet er finansiert av kommunane i Nordhordlandsregionen og UiB. Staten ved Den Norske Unescokommisjonen har òg bidratt økonomisk. Det same gjeld det lokale næringslivet i regionen. Prosjekteigar er Regionrådet i Nordhordland som representerer 9 kommunar i Nordhordland.

Lindås kommune vedtok å delta i biosfæreprosjektet i kommunestyresak 129/14, der kommunestyret vedtok følgjande:

- Lindås kommune ønskjer å delta i prosjektet for å bli ein del av Nordhordland Biosfæreområde. Kommunen forpliktar seg til å vere med å delfinansiere sin del, totalt kr 298.413,- for hovudfasen av prosjektet innanfor den ramma som er budsjettert i søknaden frå 2015 – 2017.
- Midlane til prosjektet blir henta frå disposisjonsfondet.

Om Nordhordland biosfæreområde

Nordhordland Biosfæreområde vil omfatte alle kommunane i Region Nordhordland samt Øygarden kommune og mindre delar av kommunane Vaksdal, Voss, Vik og Høyanger. Geografisk vil Nordhordland Biosfæreområde strekkje seg frå Sognefjorden, opp i Stølsheimen, ut fjordane til kysten og deler av havområda utanfor.



Den stipla lina visar det tenkte Biosfæreområdet.

Hovudmålet for biosfæresatsinga er:

«Nordhordland Biosfæreområde skal byggje på det beste frå fortida og legge til rette for ei framtidsretta samfunnsutvikling som sikrar ein berekraftig bruk av alle typar ressursar - til nytte og glede for befolkninga i dag og for komande generasjonar.»

Status for prosjektet

UNESCO sitt «Mennesket og Biosfæreprogram» (MAB) er no ei nasjonal satsing i Norge og Nordhordland vart i desember 2016 utnemnd som Norge sin første kandidat. Ein slik status gir særlege mogelegheiter for regionen. Det er no eit nasjonalt fokus på satsinga og komiteen har uttala at det er særst viktig at det første kandidaturet Norge fremjar til UNESCO vert vellukka.

Men det viktigaste er sjølvsagt kva satsinga vil bety for Nordhordland i framtida. Kort fortalt skal eit biosfæreområde vere eit godt døme for berekraftig utvikling. Det er lagt rammer for kva eit biosfæreområde skal innehalde, men regionen står relativt fritt til å forme strategien for biosfæreområdet i Nordhordland. Grunntanken i UNESCO er at MAB-programmet skal bygge eit internasjonalt nettverk av regionar som ønskjer ei meir berekraftig samfunnsutvikling. Dette inneber nye og betre måtar å nytte ressursane på.

Etter handsaming i kommunane går søknaden frå Nordhordland vidare til den norske MAB-komiteen og til nasjonale myndigheiter v/ Klima og Miljødepartementet. Regjeringa sender inn søknaden frå Norge til UNESCO i september 2018, og Nordhordland vert utpekt som eit UNESCO Biosfæreområde våren 2019.

Kva inneber det å vere eit biosfæreområde?

Pliktar

Kva er det området forpliktar seg til ved denne satsinga? Først og fremst handlar dette om at området skal leggje til rette for ei samfunnsutvikling som sikrar berekraftig bruk av ressursane våre. Vi skal sørge for at dei kommande generasjonar vil synes det er like godt å bu i Nordhordland som det vi gjer i dag. Det vil vere FN's 17 berekraftsmål som er grunnlaget for arbeidet vi skal gjere.

Det er viktig å påpeike at status som UNESCO biosfæreområde **ikkje fører til restriksjonar i bruk eller utnytting av ressursane i regionen. Der er ingen nye lovar og reglar som trer i kraft.** Men det ligg ei plikt til å arbeide for ei berekraftig utvikling og bidra til at Region Nordhordland står fram som eit eksempel på berekraft i alle deler av samfunnet.

Forprosjektsøknaden som vart handsama i kommunestyra hausten 2014 tok for seg kriterielista til UNESCO og viste korleis området stetter krava på ein framifrå måte;

- Eit levande samfunn med ei befolkning som bur og driv med ulike typar ressursutnytting / næringsverksemd. Området må verte stort nok til å ivareta, støtte og utvikle området. Med ei befolkning på om lag 53 000 , med levande lokalsamfunn og med eit godt næringsgrunnlag, er dette kravet stetta.
- Området skal ha landskap og/eller sjøområde med høge natur- og kulturverdiar og verdifulle ressursar. Nordhordland biosfæreområde strekker seg med korte avstandar frå hav til fjell med ein sterk klimagradiant som er sjeldan i verdssamanheng. Vår kulturarv er sterk og kulturlivet blomstrar i lokalsamfunna.
- Området skal vere relevant for å utforske og demonstrere ulike problemstillingar knytt til berekraftig utvikling. Vi har eit tett samarbeid med Universitetet i Bergen (UiB) for forskning i området. UiB har fått tildelt UNESCO Chairs for forskning innan MAB-programmet.
- Biosfæreområdet skal ha ei organisering og drift som er inkluderande. Før Region Nordhordland vert utnemnd til biosfæreområde skal ein utarbeide ein strategi for arbeidet. Det vert lagt opp til ein inkluderande prosess. Strategien legg føringar for tenleg organisering og drift.

I tillegg er det krav til at området skal innehalde verneområde. Innanfor biosfæreområdet er det 42 verna område. Fire av desse er tatt ut til å representere kjerneområda i biosfæreområdet. Dette er Stølsheimen, den nasjonale Laksefjorden v/ Osterøy, Loneelvi og Lurefjorden. Det er også eit krav at kvar av kjerneområda skal ha ei buffersone rundt seg. Buffersonene baserer seg på forskrifter som gjeld i området – og representerer ikkje noko restriksjonar utover eksisterande forskrifter. Sonene som gjeld Lindås kommune vert omtala her.

Lurefjorden.

I Lindås kommune er Lurefjorden peikt ut som kjerneområde, under føresetnad av at Lurefjorden vert verna slik Fylkesmannen i Hordaland har tilrådd. Vernesaka (Marin verneplan) er til handsaming i Miljødirektoratet og skal til endeleg avgjerd i Klima- og Miljødepartementet. Fjordbassenget med det marine miljøet er så unikt at Lurefjorden har sidan 1995 vore eitt av dei høgast rangerte kystfarvatn i Norge for marint vern. Det er primært dyrelivet på botnen som er verna i planforslaget. Lurefjorden er også eit særskilt naturskjønt område. Sjøreisa frå Isdal til Vardetangen er

så rik på natur- og kulturhistoriske attraksjonar at Riksantikvaren i 2016 utnemnde Lurefjorden med landskapet omkring som "Kulturlandskap av nasjonal interesse".

Bufferzona skal sikre at Lurefjorden ikkje vert utsett for forureining. Zona baserer seg på lokale forskrift for utslepp av sanitært avløpsvatn frå bustader og fritidsbustader. Denne er under arbeid og er planlagt vedteke av kommunane rundt fjorden i løpet av 2018. I tillegg baserer bufferzona seg på "Kommunedelplan for Lindåsane, Lygra og Lurefjorden" vedteke i 2015. Delplanen har heimel i plan- og bygningslova (pbl) §11-1, 3.ledd og § 11-5, og inneheld ei rekke miljøtiltak for å sikre friluftsliv, landbruk og naturmiljø (på land og i sjø).



Det mørkeblå feltet er det føreslegne verna området (i Marin verneplan) som utgjer kjernesona i biosfæreområdet. Det lysegrøne feltet er bufferzona.

Den nasjonale Laksefjorden.

I tillegg har Lindås kommune ei buffersone for den nasjonale laksefjorden: Osterfjorden og Alverstraumen. I denne bufferzona er målsettinga å sikre smolten sin vandringsveg frå kjernesona og ut til ope hav. Bufferzona er basert på Mattilsynet sin gjeldande forskrift på at fiskeoppdrettsanlegga langs svømmeruta er forplikta til å

sikre lav luspopulasjon i den perioden smolten passerar.

Fjordane rundt Osterøy vart etablert som nasjonale laksefjord ved St. prp. nr. 32 (2006-2007): «Om vern av villaksen og ferdigstilling av nasjonale laksevasdrag og laksefjorder».

I dei mange vassdraga finst fleire lokale stammer av sjøaure og laks. Vossolaksstammen er internasjonalt kjend som den største laksen i Atlanterhavet. Etter sterk nedgang i talet på Vossolaks er det no sett i kraft ei rekke tiltak for å reetablere bestanden. Buffersona vert forankra i det langvarige samarbeidet som er formalisert gjennom tiltaksutvalet i «Redningsaksjonen for Vossolaksen». Her er representantar frå forvaltning, næringsinteresser, forskning og lokale kreftar inkludert i utvalet og i arbeidet med å redde Vossolaksen. I denne samanhengen vert særskild samarbeidet med BKK og dei ulike oppdrettsanlegga om tiltak for ei vellukka redningsaksjon, vektlagt.

Dette kjerneområde med tilhøyrande buffersone er del av ein heilskapleg strategi, med bidrag frå næringslivet og forskning, som gjev laksestammene ein særskild trygging på både gyte- og oppvekstområda i elvane, og i vandringsområda i fjordane.



Det mørkeblå feltet er den nasjonale laksefjorden som er ei kjernesone i biosfæreområdet. Det blågrøne feltet viser buffersona.

Moglegheiter

Kvifor skal Nordhordland vere eit UNESCO Biosfæreområde – kva nytte kan vi ha av det – kva moglegheiter gjev det oss?

Styringsgruppa har satt opp ti punkt som visar at området vil vere tent med å få denne statusen.

1. **Statusen vil gje oss ein 'motor' for gjennomføring av FNs berekrafts mål i regionen.**

Biosfæreprosjektet kan bli et viktig verktøy for gjennomføring av FNs berekrafts- mål i Nordhordlandsregionen og vil ta ei særleg rolle for informasjon til og utvikling av aktivitetar for born og unge. Ut frå Stortingsmelding nr. 29 (Perspektivmeldingen 2017) har regjeringa bestemt at berekraftsmåla skal vere styrande for verksemda i Norge.

2. **Fokus på ei heilskapleg samfunnsutvikling der vi i større grad sikrar**

biologisk mangfald, berekraftig bruk av naturressursane og fremjar lokal kultur.

- 3. Gjennom å vere eit biosfæreområde skal vi gjere innbyggjarane meir bevisste, deltakande og engasjerte - slik at dei i større grad tek ansvar for og kontroll over eiga utvikling.**

Biosfæreprosjektet vil trekke flest mogleg med i arbeid og aktivitet gjennom informasjon, kontaktskapande verksemd og samarbeidsprosjekt.

- 4. Satsinga gjev oss eit naturleg høve til å auke lokal matproduksjon ved å nytte naturressursane på land og i sjø på ein meir berekraftig måte.**

Biosfæreprosjektet ønskjer å auke graden av lokal matproduksjon både fordi dette gjev tilgang til matvarer med høg kvalitet og fordi ei slik utnytting bidreg til større bevisstheit om eigne ressursar og eigen identitet.

- 5. Som eit biosfæreområde er det naturleg å vidareutvikle lokale strategiar og engasjement for å redusere menneskeskapte klimaendringar.**

Ein ser i dag følgjene av klimaendringane gjennom meir ekstremvær på Vestlandet. Vi set fokus på behovet for informasjon og lokale tiltak for eit breitt samarbeid med både med grasrota og store næringslivsaktørar.

- 6. Ei slik satsing skal bidra til auka innovasjon og grøn næringsutvikling.**

Dei store oljeressursane utanfor kysten har skapt mange arbeidsplassar og stor verdiskaping i Nordhordland. På sikt er det venta ein nedgang i denne aktiviteten og det er trong for nytenking og omstilling. Gjennom biosfæresatsinga får vi tilgang til fleire verktøy i arbeidet med å fremje endring til eit grønar næringsliv.

- 7. Nordhordland Biosfæreområde skal bidra til å utvikle berekraftig turisme i regionen.**

Frå andre biosfæreområde rundt om i verda har dei har klart å byggje opp ei sterk reiselivssatsing. Nordhordland har eit stort potensiale for utvikling av reiselivet – knytt til aktivitetar både langs kysten og i fjellet.

- 8. Biosfærestatusen gjev grunnlag for merkevare- og identitetsbyggande arbeid.**

Nordhordland er ein solid industriregion med lange tradisjonar og ein sterk lokal kultur. Likevel har det vore vanskeleg å byggje opp ein tydeleg merkevare knytt til regionen sin identitet. Biosfærestatusen kan nyttast til å tydeleggjere området og sette regionen på kartet.

- 9. Området får eit tettare samarbeid mellom samfunnet og forskings- og utdanningsinstitusjonar for å sikre at utviklinga vert basert på kunnskap.**

Biosfæresatsinga i Nordhordland er eit samarbeid mellom kommunane og Universitetet i Bergen. Den vidare utviklinga legg opp til at dette samarbeidet vart oppretthalde og utvikla vidare til å omfatte også andre lokale, nasjonale og internasjonale universitet og forskingsinstitusjonar. Biosfærestatusen skal bidra til ei kompetanseoppbygging som svarar til regionen sine utfordringar og behov.

10. Gjennom Nordhordland Biosfæreområde skal regionen kunne utvikle og nytte eit verdsomspennande internasjonalt nettverk og arbeide aktivt for at erfaringane vi gjer lokalt skal delast med andre tilsvarande regionar nasjonalt og internasjonalt

Det er nær 700 biosfæreområder verda over og det går føre seg ei omfattande kunnskapsutveksling mellom desse – på alle nivå i samfunnet. Vi får tilgang til eit internasjonalt nettverk både direkte gjennom MAB-programmet og indirekte gjennom samarbeid med forskings- og utdanningsinstitusjonane.

Organisering

I løpet av 2018 må prosjektet leggje til rette for eit breitt arbeid for å konkretisere måla og utvikle aktivitetar som skal knytast til biosfærestatusen. Her må kommunane, næringslivet, lag/organisasjonar og andre aktuelle samfunnsbyggjarar ta del i arbeidet og sikre eit solid resultat som gjev grunnlag for arbeidet i dei første åra etter at biosfærestatusen er på plass. Framtidig organisering av biosfæresatsinga heng saman med dei arbeidsoppgåvene som biosfæreområdet skal ha og endeleg organisasjonsstruktur skal utarbeidast i den planlagde strategiprosessen.

Til no har biosfæreprosjektet bygd på ein samarbeidsavtale frå 2013 mellom Regionrådet i Nordhordland og Universitetet i Bergen om utvikling av søknad om biosfærestatus og om eit framtidig forskningssamarbeid innan biosfæreområdet. Alle kommunane som er knytt til Regionrådet i Nordhordland har tatt del i satsinga. Dette er kommunane Austrheim, Fedje, Gulen, Lindås, Masfjorden, Meland, Modalen, Osterøy og Radøy. I tillegg til desse, er også Øygarden og delar av kommunane Vaksdal, Voss, Vik og Høyanger del av prosjektet.

Praktisk har organiseringa vore slik:

- Kommunane i Nordhordland har vore overordna eigarar av biosfæreprosjektet og Regionrådet i Nordhordland er har vore prosjekteigar.
- Administrasjonen til Regionrådet i Nordhordland, Nordhordland Utviklingsselskap IKS (NUI) har prosjektansvaret i søknadsperioden. NUI har sett ned ei arbeidsgruppe for prosjektarbeidet. Denne har eigen administrasjon og fagleg representant frå UiB. I tillegg ekstern konsulent.
- Ei styringsgruppe for prosjektet har fungert sidan 2013. Den har vore sett saman av ordførarar (3), og representantar frå Hordaland fylkeskommune, Fylkesmannen i Hordaland, Universitetet i Bergen, næringslivet og lag / organisasjonar.

Den endelege forvaltnings og organisasjonsstrukturen vil som nemnd bli bestemt i samband med utvikling av strategi for biosfæreområdet. Dette vil skje i løpet av 2018 og 2019.

Styringsgruppa for biosfæreprosjektet har peika på følgjande punkt som viktige for organisering av biosfæreområdet:

- Organiseringa av Nordhordland Biosfæreområde må sjåast i direkte samband med dei oppgåver og den funksjon biosfæreområdet skal ha. Før endeleg organisasjonsform vert bestemt, skal føremål og vedtekter for organisasjonen på plass.
- Organisasjonsmodellen må ikkje låse oss til ein organisasjonsform som vi

ikkje er tent med over tid. Den bør vere dynamisk slik at den kan tilpassast ulike framtidige scenario.

- Det er viktig med stor openheit og at alle (særleg lag og organisasjonar) vert inkludert i styring av biosfæreområdet.

Økonomiske konsekvensar – årlege budsjett frå 2019 - 2021

Budsjettframlegget må sjåast i samanheng med dei arbeidsoppgåver som vert lagt til biosfæreprosjektet slik det er skissert under dei 10 punkta ovanfor. Dette vil bli tydelegare når den endelege strategien for biosfæreprosjektet er på plass, når det er bestemt kva aktivitetar som skal leggjast til satsinga og ein har valt ei høveleg organisasjonsform.

I budsjettet er det lagt opp til tre årsverk i biosfæreprosjektet. Det er også lagt inn kostnader til informasjonsarbeid og møteverksemd. Ein viktig del av arbeidet er å vere med å ta initiativ til, eller bidra til, tenlege prosjekt for biosfæresatsinga. Prosjekt som vert sett i gong i tilknytning til biosfæreområdet, må finne si eige finansiering utanom budsjettet.

I fordelinga mellom kommunane (dei kommunane som er innan biosfæreområdet med heile kommunen) legg vi til grunn slik fordelinga har vore; 50% er ein fast grunnsum og 50% er delt etter folketal. Fordelinga må vurderast til budsjettet i 2020 – etter kommunesamanslåinga.

Kostnader		
Prosjektadministrasjon (3 årsverk)		2 350 000
Arbeid frå styringsgruppa / kommunane		250 000
Ekstern ekspertise		100 000
Møter / seminarer		150 000
Informasjonsarbeid		100 000
Reiser		100 000
Diverse		50 000
Totale kostnader		3 100 000
Inntekter		
Kommunane i biosfæreområdet		600 000
Eigeninnsats, styringsgruppa, kommunane		250 000
Universitetet i Bergen		300 000
Hordaland Fylkeskommune		200 000
KMD / statleg programfinansiering		1 500 000
Næringsliv / Sponsorar		250

		000
Totale inntekter		3 100 000

Vurdering:

Lindås kommune vedtok i desember 2014 å delta i prosjektet som skulle danne grunnlaget for ein søknad om å få status som biosfæreområde. I perioden 2015 – 2017 har Lindås bidratt med totalt kr 298.413,- til prosjektet. Det er gledelig å sjå at regionen oppfyller alle kriterier for å bli eit biosfæreområde og at vi har mange gode kvalitetar for eit slikt område. Prosjektet har jobba godt med grunnlaget for ein søknad og det er lagt opp eit vidare løp som skal sikre at Nordhordland vert utpeikt som eit UNESCO Biosfæreområde våren 2019.

Hovudmålet med Nordhordland Biosfæreområde er å byggje på det beste frå fortida og legge til rette for ei framtidsretta samfunnsutvikling som sikrar ein berekraftig bruk av alle typar ressursar - til nytte og glede for befolkninga i dag og for komande generasjonar. Det er lagt rammer for kva eit biosfæreområde skal innehalde, men regionen står relativt fritt til å forme strategien for biosfæreområdet i Nordhordland. Det blir presisert at status som UNESCO biosfæreområde ikkje fører til restriksjonar i bruk eller utnytting av ressursane i regionen, og at det er ingen nye lover og reglar som trer i kraft. Men at det ligg ei plikt til å arbeide for ei berekraftig utvikling og bidra til at Region Nordhordland står fram som eit eksempel på berekraft i alle deler av samfunnet.

Verna områder og buffersoner

Det å bli eit biosfæreområde handlar altså om å sjå samfunns- og næringsutviklinga i eit berekraftig perspektiv. Det er presisert at dette ikkje er eit verneprojekt, men eit prosjekt som legg til rette for best mulig framtidig utvikling. I biosfæreområdet er det krav om verneområde og det er identifisert 42 verna område, fire av desse representerer eit kjerneområde. For Lindås kommune gjeld dette spesielt Lurefjorden. Prosjektet legg til grunn verneplanen som Fylkesmannen i Hordaland har foreslått for Lurefjorden, med tilhøyrande buffersoner.



Buffersonene baserer seg på forskrifter som gjeld i området – og representerer ikkje noko restriksjonar utover eksisterande forskrifter. På kartet til venstre ser vi det mørkeblå feltet som er foreslått verna området (i Marin verneplan) som utgjer kjernesona i biosfæreområdet. Det lysegrøne feltet er buffersona.

Slik kartet er presentert vil verna område og buffersoner dekke store deler av Lindås og det er uklart kva verknader og konsekvensar dette vil få i praksis. Lokal forskrift for utslepp er under arbeid, og vil vise til nokre konkrete områder der det ikkje vil bli opna for nye utslepp. Dette vil vera eit mykje snevrare område enn det som går fram av kartet. Vi går ut frå at kartet illustrerer den tenkte buffersona i biosfæreområdet, men at det ikkje har noko forvaltningsmessig eller juridisk verknad for tiltak i områda, ut over dei planar, lovar og forskrifter som allereie er gjort gjeldande eller er vedtatt. Slik rådmannen ser det er det viktig for kommunen å få gode avklaringar undervegs på kva verknader og konsekvensar eit verna område og buffersoner i eit biosfæreområde vil ha for vidare utvikling av området.

Økonomi

Kommunane som deltar i prosjektet har bidratt med kr 500.000 årleg i perioden 2015 – 2017. Neste fase frå 2019 – 2021 er det lagt opp til at kommunane skal bidra med kr 600.000 årleg. Fordeling av kostnad har vore 50% er ein fast grunnsum og 50% er delt etter folketal. For Lindås kommune blir det ein liten auke i 2019 og frå 2020 blir dette handtert av Alver kommune.

Konklusjon:

Det er positivt at Nordhordland har mulighet til å få status som biosfæreområde. Det

kan legge grunnlaget for ei heilskapleg og berekraftig utvikling av regionen. Ein slik status kan bidra til å profilere regionen på mange område. I den vidare prosessen er det viktig at prosjektet har god dialog med kommunane rundt problemstillingar med verna område og buffersoner, slik at det blir klarlagt kva verknader og konsekvensar dette har for utvikling i dei områda.

Rådmannen rår til at Lindås kommune støttar Region Nordhordland sitt kandidatur til å bli eit UNESCO Biosfæreområde. Kommunen forpliktar seg, i samarbeid med dei andre kommunane i regionen, å finansiere sin rettmessige del for første fasen av biosfæreområdet si verksemd - innanfor den ramma som er sett i prosjektbudsjettet for perioden 2019 – 2021. Finansiering blir avklart i samband med økonomiplanprosessen for 2019.